

kontuola...

Antzuolako hamabostekaria. 4 zenbakia, 1997-10-24

Gero eta biztanle gutxiago

338 pertsona joan dira herritik azkenengo hamar urteetan

Bergara, Zumarraga, Oñati eta Legazpi dira antzuolarrek bizitzeko hautatzen dituzten herriak. Azken hamar urteotan Antzuolatik alde egin duten biztanle gehienak Bergaran bizi dira; hala ere, badira euren sorterrira itzuli diren asko eta asko; 1986tik, 62 lagun joan dira Euskal Herritik kanpora.

Azkenengo hamar urteetako erroldako datuen arabera (1986-1997), 338 pertsona joan dira herritik. 1991. urtera arte 50 bat pertsonak utzi zuten Antzuola eta 1992tik aurrera, kopurua igotzen joan da urtetik urtera.


1996an egindako errolda ikusita, 30-55 urte bitarteko 144k alde egin du te herritik; era berean 18tik 30 urtera artekoak ere asko izan dira, 117 pertsona hain zuzen ere.

Nora joaten dira antzuolarrak?

Gehienak Bergarara joaten dira, 107 pertsona joan baita bertara. Zumarragara ere antzuolar dexente joan da, 40 pertsona, hain zuzen ere.

ANTZUOLATIK NORA:

Bergara	107
Zumarraga	40
Urretxu	14
Oñati	11
Legazpi	10
Zarautz	10
Araba	12
Bizkaia	13
Nafarroa	8
Euskal Herritik kanpora	62



- 1997an, oraingoz, 29 lagun joan dira herritik.

ANTZUOLATIK ALDE EGITEKO ARRAZIOAK

Antzuolatik alde egiteko arrazoiak jakin nahian, herritik joan direnetako batzuekin egon gara. Zergatik joan zara Antzuolatik? Horixe da Ritxar, Enkarna eta Piediri galdetu dieguna.



Ritxar Cuevas

Amak eta etxia erostia bihar zebeñ baiña Antzuolatik jun biharra euki giñuan etxebizitzak karuak zirelako eta Bergaran kondiziño hobiak zerelako etxebizitzak lortzeko.



Enkarna Terrero

Gehien bat umeengatik izan zen; eskolara joateko autobusak behar zituzten eta momentuan oso gaizki zegoen autobusen kontua; gainera, gizonak ere Bergaran lan egiten zuen.



Piedi Vargas

Ezkondu nintzanean etxea erosi nahi genuen eta Zumarragan aurkitu genituen Antzuolan baino etxe merkeagoak (babes ofizialekoak). Gainera, gizona ere Zumarragako da.

Ipuin kontaketa ikastaroa

Martitzen honetan hasi den Kontu Kontari ikastaroak azaroan izango du jarraipena. Rai Buenok, Oihulari Klowneko kideak, eskeiniko duen ikastaroa lau saiotan emango da, urriaren 21 eta 28an eta azaroaren 4an eta 11n.

Mendi irteerak

Arrola mendizale elkarteak bi irteera antolatatu ditu. Urriaren 26an Mendaurrea eta azaroaren 9an Opa-kua-Azazeta ibilaldia egingo dute. Azken honetarako izena ematea azaroaren 3an, astelehena, izango da Arrolako lokalean, 19:00etatik aurrera. Bide batez, Arrolakoek jakinarazi nahi dute mendi irteeren argazkiak jaso nahi dituztela mendizale elkartearen 25. urteurrenerako. Hortaz, argazkiak baldin badauzkazue antolatzaileekin egotea besterik ez duzue.

Argazki erakusketa

Gaur, sari banaketaren ondoren, zabalduko da oporretako argazki lehiaketara aurkeztutako argazkien erakusketa, 19:00etatik 20:30etara. Zapatuan eta domekan ere egongo dira ikusgai argazkiok Udaletxeko areto nagusian goizeko 12:30etatik 14:00etara eta arratsaldean 19:00etatik 20:30etara. Aukera paregabea herritarren zaletasuna ezagutzeko!

Mus Txapelketa

Eginek antolatutako Mus Txapelketaren kanporaketak izango dira asteburu honetan ere. Eguakitzean, urriak 24, Ongi Etorrin jokatuko dute 22:15etan eta zapatuan, urriak 25, 16:00etan Surpen. Azkenengo saioa Olalden izango da urriaren 31n 22:15etan. Antolatzaileek gogorarazi dute saio bakar batean parte hartu daitekeela.

172 sinadura auzoko konponketen alde



Ziburuen tamainari buruzko kekek ere izan dira.

Errekalde auzokoek 172 bizilagunen sinadurak aurkeztu dituzte udal-txean, auzoko arazoak konpontzeko eskaerarekin batera. Auzoko batzuen hitzetan, ekimen honen helburua "auzoan urteetan konpontzeke dauden arazoei irtenbidea bilatzea" da.

Auzoko ziburu, aparkaleku, potzu septiko, argiztapen eta abarrez dituzten kekek agertzen dizkiote alkateari. Bizilagun batek adierazi digunez "hasiera ba-

tean, arratsaldero umeekin auzoan elkartzen ginen ama batzuek geure artean kekatzen hasi ginen auzoaren egoeraz, eta azkenean, eskaera formala egitea erabaki genuen".

Udalaren erantzuna

Mikel Larrea alkateak dioenez, "harrituta gelditu nintzen sinadura horiek denak

ikustean, orain arte inork ez dituelako eskaerak horrela egin; hala ere esan beharra dago Errekalde konpontzeko proiektua lantzen dihardugula eta egingdako eskaerak aurreikusten direla bertan". Alkateak, bestalde, auzokideei bidalitako gutunean, Udalak Errekalde auzoari buruz eman dituen pausoak azaltzeko prest dagoela adierazten du. "berba egiteko gertu nagoela azaldu nahi diet gutunean".



Nafarroa Oinez 97

Goizeko 08:00etan irtenda, bi autobus joan ziren domekan Tafallara, Nafarroa Oinezera. Giro aparta izan zela komentatu dute bertara joan zirenek.

igok eta Txomin

Pintura orokorrean.

Paper, tela, binilo, kortxo-zoko... estaldurak.

Gotelesa, iztukuak eta bestelako imitazioak.

ANTZUOLA
☎ 76 60 39

BERGARA
☎ 76 19 98

**GOROSTI
Taberna**

☎ 76 62 96

Zurrategi plaza ANTZUOLA

ANTZUOLA

Apainketak eta isolamenduak
Pladurrezko dibisioak

Kalegoi, 21 ANTZUOLA
Tf.: 72 30 05
Billegia: 78 70 40

Isabel Martin, futbol taldearen *amapuntakua*

Goxokiak, bonboiak, patata tortilak... zer ez die eramaten bere mutilei Isabelek? Hamabostero, taldeak etxean jokatzen duenean, Estalako futbol zelaira igotzen da Isabel, bere poltsa eta guzti; joan zen zapatuan ere, lau bat tortila, txorixua, ardoa eta gainera bi txanpan botila eraman zituen; baina Isabelek asteroko partiduaren zain egoten dela aitortu digu: "asko gustatzen zait eta jendea partiduetara joan dadila gustatuko litzaidake".

Jokalariek ere eskertzen diote berak gustora egiten duen lana eta joan zen zapatuan, gol bat eta lora sorta oparitu zizkioten bere urtebetetzeagatik. Hiru denboraldi daramatza

Isabelek aurten erregionalean jokatzen duen taldea animatzen: "ia afonika ere galditu naiz, baina mutilek merezi dute; partidu ostean denok elkartzen gara meriendatzen eta beste herri bateko jokalaria batek esan zidanez, hona galtzera etortzeak ere merezi du, meriendagatik".



Isabel, lore-sorta oparitu ziotenean.

Gobernu Batzordea ez zen egin

Udaleko Gobernu Batzordearen bilera egin gabe gelditu zen joan zen martitzenean, urriaren 7an. Udaletxekoek gogoratzen dutenez, ez da horrelakorik gertatu azkenengo urteetan, baina joan zen eguneko Batzordea bertan behera gelditu zen, quorum ezagatik. Gobernu Batzordea lau zinegotzik osatu arren, hiru nahikoa dira bilera egiteko; hala ere, Herri Batasunako Mahai Nazionaleko kideen aurkako epaiketa dela eta, herriko HBk udal administrazioarekin ez kolaboratzea erabaki zuen epaiketak dirauen bitartean. Ondorioz, alderdi horretako batzordekideak alde egin zuen eta, beste batzordekide bat ere falta zenez, ezin izan zen egin bilerarik egin, bi zinegotzi baino ez baitziren gelditzen.

Cheren ideiak 30 urte eta gero

Che Guevararen heriotzaren 30. urteurrenean, Antzuolako ZUTIKek Jorge Fernandez, Kubako Kultura eta Hezkuntzaren garapenerako Fondoko zuzendaria, gonbidatu du urriaren 30ko hitzaldiara. Argazki erakusketa eta 12 minutuko bideo bat ikusteko aukera ere izango da.

GURE ARTIAN

Zergatik aukeratu zenuen Antzuola bizitzeko?



**Marije
Zubimendi**

Antzuolar batekin ezkondu nintzen; berak hemen lan egiten zuen eta nahiko argi neukan Antzuolara etorriko ginela. Gainera hamar urte ondoren ohitu naiz hona.



**Yolanda
Miner**

Gizonak Antzuolan lan egiten zuen eta kuadrilan aspalditik ateratzen ginen Antzuolan; asteburuero hemen egoten ginen eta integratuta sentitzen nintzen.



**Aitor
Belastegi**

Ezkondu nitza-nian pixu billa ibilli giñan Antzuolan eta Angiozarrren eta azkenian hemen topau giñuan. Gaiñera andriak Antzuolan geldittu nahixago zeban.

**LEKU-BERRI
MERENDEROA**

Janariak eta edariak


Tf. 76 60 94

LARREA

TABERNA

**Kalebarren, 17
ANTZUOLA**

**IOSEBA AZKARATE
Aluminio arotza**



- Zubi termikoak
- Hausturak
- Forma-seriea eta 42-forma
- P.V.C.
- Mota guzietako irristagailuak
- Bulego ibixturak
- Barandak
- Eta abar

ATE-AUTOMATIZAZIOA
Tf. 76 64 08 Antzuola

Olatak eta Liberamiak Domusantu egunean

Azaroak bat, Domusantu eguna; hildakoen eguna; animen eguna... Nork ez ditu gogoratzen jadanik gure artean ez dauden senitartekoak azaroaren batean? Eliza katolikoak egun horretan gogoratzen ditu hildakoak; baina orain ez dira domusantu egunak lehen zirena. Gaur egun ez zaizkie olatak eskeintzen hildako senitartekoei; ez da prozesiorik egiten eta ez dira "Liberamiak" kantatzen -diruarekin ordaintzen ziren kantak-. Gogoan dauzkate horiek denak Simon Artolazabal eta Serapia Larrañagak.



"A bade bakoitzak hiru meza emoten zittuan Domusantu egunian". Horixe dauka gogoan Simonek; hiru apaiz ziren Antzuolako parrokan, eta 1945. urtera arte gutxi gora be-

hera, Domusantu eguna elizkizunetz betetako eguna izaten zen. Goizetako meza izaten zen "familixa bakoitzak ipintzen zeban trapu beltz bat sepultura gainian eta han ipintzen zien argizariolak; gero abadia etortzen zan eta sepultura danetan emoten zittuan errespontsuak, Pater Nosterrak, familixakuen hildakuen alde". Arratsaldean, berriz, prozesioen txanda izaten zen; Simonek dioenez "elizpetik bueltia egiten zan, goiko atetik erten eta beheko atetik sartzen zan". Prozesio horretan, gainera, beste ohitura bat ere bazen; dirudienez garai batean hildakoa beheko atearen aurrean ipintzen zen, elizara sartu beharrean; hori dela eta, Domusantu egunean, prozesioak zirauen bitartean, han bertan geldialdiak egiten ziren, "abadiak botatzen zittuan han Pater

Nosterrak, lehenengo kalia hil dien animen alde erresponso bat, gero Lizarragakuen alde beste bat, Basaldekuen alde beste bat... hola auzo danen alde; eta meza nagusixan be egitten zan auzoka Pater Nosterrena".

Abestiak ordaindu egiten ziren

70 urte daramatza Simonek organua jotzen eta oraindik ere gogoratzen ditu Domusantu egunean abesten ziren kantu bereziak; "egun hortan aprobeztatzen zan erresponsoak egiteko eta Liberamiak pe kantatzen zien; 5-6 bat diferentziak kantatzen zien, 3 eta 4 aho-tsetara, segun dirua izeten zan eta gero pezeta bana edo biña emoten jakon

kantore bakoitzari". Horri buruz kalean kantatzen zen beste abesti batekin ere gogoratzen da Serapia: "honek ba dik, honek ba dik, kanta dezagun gogotik, honek ez dik, honek ez dik, kendu dezagun bistatik".

Olatak hildakoei

Garai hartan ez zen dirua gaur bezala erabiltzen. Ohiturak dioenez, Domusantu egunean, olatak ematen zitzaizkion urtearen barruan hildakoren berri izan zuen familiari. Serapiak kontatu digunez, olatak, "hiru puntako ogixak ziren eta egun horretan limosna moduan egiten ziren eta gero erresponsoa emotuz zanian olatak jasotzen zien; pater noster edo rezo bat zan olata bakoitzeko". Olatak apaizak jasotzen zituen eta gero erreal baten truke saltzen zituen. Serapiak gogoratzen duenez, olatei itxura hori bea emateko "baserriko ogixakin egiten ziren eta arrautzia emoten jakon gainetik brillua etaratzeko". Simonek dioenez, "abadiak sakukarak jasotzen zittuen".

■ ■ ■
"Abade bakoitzak hiru meza emoten zittuan
Domusantu egunian" SIMON ARTOLAZABAL
■ ■ ■



Simonek 90 urte beteko ditu datorren martitzenean, urriak 23



**MUEBLES
IGEA**

Zurrategi plaza, 4 behea ANTZUOLA Tf. eta faxa 78 71 80

Sukalderako eta
bainurako altzariak